

【老屋下个風景】蕭瑞琪原作

半晝邊，轉去老屋下遶遶啊。一行入屋裡背，阿爸坐在矮凳仔、報紙放在矮桌仔頂，棚等目鏡在該看國家大事；阿姆坐在竹椅、腳架在細矮圓凳，目聚聚仔看等家庭副刊。日花仔對窗仔斜斜晟入屋肚恬靜恬靜，眠在桌頂頂个烏貓仔兩隻腳還揸等報紙在該睡目，分吾个打門聲嚇一下，擘開目珠懶懶个看過來，又眠轉去繼續睡厥目。

老屋下有三隻貓仔，全都係路脣拈來个。該當時還係細貓子，正開目<sup>1</sup>無幾日，分人用紙箱仔裝等囤在路脣草墩頂。阿爸散步經過，聽著細細聲个喵！喵！喵，正發現這兜衰過个細貓子。阿爸同細貓子帶轉屋下，倒一息仔牛乳在盤仔，細貓子鼻著牛乳味，搖搖擺擺行到盤仔脣，用厥幼幼仔个舌嫵緊舐，牛乳還膏到厥鬚鬚頂變白鬚仔，當得人惜。三隻貓子个毛色無共樣，一隻像乳牛一跡烏一跡白，尤其四隻腳个腳趾頭前白白，當像著白襪樣仔，就同佢安名「細白襪」；另外一隻全身係烏金烏金个長毛，就喊佢「長毛仔」；還有一隻生著柑仔色，又有一浪一浪个花

紋，就安到「細柑仔」。毋過阿姆無恁大神氣記佢兜个名仔，就喊佢兜「花花个」、「長毛个」、「黃黃个」。

細貓仔日見日大，變到活跳个大貓仔，不時會自家打開窗門走出去野上野下，等到野瘵咄又對窗門鑽入來。貓仔本成就係貓科動物，同獅仔共樣有打獵个本等，雖然經過咄一萬年个馴化，毋過厥本能還無完全消失。故所，佢兜暗晡頭時常會走出去捉老鼠仔、透地龍、壁蛇轉來放在門頭前；日時頭還會在陽臺晡鳥仔，見擺係看著佢恬索索仔跔在該，目金金仔看等屋頂，總會有飛毋掣過个禾鷄仔、斑鳩仔、月鴿仔畀打下來。

這駁仔轉去老屋下，總會看著三隻貓仔目絲絲仔在該啄目睡，阿姆講：「這兜貓仔老咄喲，毋多好出去寮咄，每日眠在屋肚睡目。」係照貓仔个年紀來算，佢兜也係高齡貓咄，逐朝晨兩個看報紙个老人家同三隻啄目睡个老貓仔就係老屋下个風景。

<sup>1</sup> 開目：音 koi' mug`；動物初次張開眼睛。

【一雙筷子】黃秋枝原作

「好撿碗筷哩啲！」

佢係用筷子个民族，從細就愛學會擎筷子，愛學會擎筷子之前爺哀挾食分佢，言盡會使筷子食飯以前，筷子擎等搵上搵下，因爭無熟絡划飯挾菜个技巧，嘎挾到溶溶跌；等到會使筷子該下，又好擲擲仔這挾該挾，挾到歸碗自家一等好食个菜。

屋下世大人長間教講：「筷子毋好恁精！好食个東西愛曉得勻等來大家食。」阿姆乜教講，筷子係有生目珠个，佢人想食哪樣就看準準挾啊起，毋好操去操轉搵起搵落，愛注重衛生同禮貌正好。還有，食飯時節，筷子愛擎正來，愛遵守擎筷子个規矩，做毋得用筷子敲碗、敲桌仔像乞食仔討食樣仔；手指公摺指人指愛夾核筷子个上截，另外三隻手指自然彎彎對齊，夾好筷子个兩頭，指人指毋好搵起來像指等人罵樣仔；毋好咬筷子；筷子乜做毋得插在飯碗个中央，還有，食飯拿等筷子準賭搞又乜做毋得。

係無，世大人就會大聲哆：「無人教招係無？」過較嚴條个，無就筷頭嫵掃啊去，該餐飯乜有可能分世大人喝下桌。

盡記得，還細時吾屋下个筷子，係竹仔做个，阿姆長透吩

咐，好天个時節筷子愛拿到日頭下晒，係無斯會生菇上烏點，愛落嘴个東西儘採毋得，愛知「病對嘴入，禍對口出」个道理。故所，還細時，晒筷子乜係吾个頭路，一支一支仔頭對頭、尾對尾，擺開來拿到天下晒日頭。

頭擺人，勾挽人客在屋下過餐乜會講：「糯米打糝罕得幾多時！便菜飯仔乜就加一雙『筷子』定定。」只愛人情好，食水乜甜，一雙「筷子」增添了人摻人之間个交流同感情。還記得，有一擺愛敬床公婆搵擺菜盤，佢就照佢人食飯个規矩準備一雙筷子，阿姆遽遽喊講同筷子拿轉去，相傳，敬床公婆毋使擎筷子，係擎筷子敬床公婆，床公婆會拿筷子教示細人仔這種生趣个講法。

人講，筷子一頭圓一頭方就像天圓地方；手擎筷子五隻手指愛上中下配合使用，代表天地人三才；筷子一分為二，又合二為一，代表陰陽結合，包容、平衡<sup>1</sup>、和諧。

<sup>1</sup> 平衡：音 pin<sup>ˇ</sup> fen<sup>ˇ</sup>；平衡。對立的雙方面在數量、質量或力道上相等或相互抵消。

112 年全國語文競賽客家語朗讀文章高中學生組（四縣腔）

編號 9 號

【細日頭】胡明華原作

細日頭係阿生畜个鸚哥<sup>1</sup>，兩片面頰卵有紅叨叨个圓箍仔，看起來就像係細細个日頭，故所安佢「細日頭」。佢圓身白白，尾長長，頭那頂有一抓長長黃黃梳到腦屎背个頭那毛，身形盡靚。

細日頭還係細鳥子个時節就分阿生對店項帶轉屋下，對佢歸身無毛軟頭扁摺到厥翼胛毛生到亮亮齊齊，同佢最親个人就係阿生，見看著阿生，佢就歡喜靈天<sup>2</sup>，暢到奈毋得，啾啾滾緊唱歌。佢長透企在阿生个拈食指<sup>3</sup>無就肩頭項，不時就佷兼去，用背輕輕仔啄阿生个面、西出一細截舌嫵咬阿生，有時還會咬到厥耳砵，迂來迂去，實在生趣。有一擺，阿生對等自家翕一張細日頭咬厥面个相片，細日頭看啊著，煞煞又過再咬加一到，害屋下人笑到貶轉來。

細日頭个毛正生齊个時節，識飛走一擺。該日阿生毋知哪條腸仔毋直<sup>4</sup>，攞等鳥籠去公園，學人放鳥仔，望想嘍細日頭飛出去

<sup>1</sup> 鸚哥：音 en' go'；鸚鵡。鸚形目，在動物分類學上是鳥綱中的一個目。

<sup>2</sup> 歡喜靈天：音 fon' hi' lag' tien'；欣喜異常。

<sup>3</sup> 拈食指：音 ngiam' siid zii'；食指。

<sup>4</sup> 毋知哪條腸仔毋直：音 m' di' nai tiau' cong' e' m' ciid；不知哪條腸子打結，喻心情不好。

再過飛轉來，望想展風神。無想著鳥籠仔正打啊開來，就看等細日頭翼披披仔，兩下半就飛到十二樓恁高，跔等就無影無跡也。阿生心焦到無結無煞，滿哪尋去尋轉都尋無！佢歸暗晡睡毋落覺，天旨光就緊拚拚仔再去公園尋。佢有聲喊到無聲，嘴又燥肚又渴。好得皇天不負苦心人，包尾分環保人員在一頭樹頂尋著，一人一鳥正過再相逢。

前一駁仔，阿生試著細日頭大咧，就無注意照顧，淨顧自家个事，陪佢个時間緊來緊少。麼人知細日頭嘎開始背自家个毛，到有一日，兩片翼胛下總下分佢自家擲到淨淨，就像人發病頭那敷毛敷到光頂共樣共樣，這時阿生正緊張起來，遽遽送去鳥仔醫院。衰過正得啊！藥錢比人看病還較貴！

人講「慧慧慧，豬肉煮米醬；精精精，無屋好居身。」阿生原旦還話著自家一等精，省忒陪細日頭个時間就賺著時間來趕事，毋會仰般，結果害著細日頭，也害著自家，正經係假精無錢賺。

這擺阿生學乖哩，開始認真照顧細日頭，還分佢戴伊麗莎白頸圈<sup>5</sup>，莫分佢過再背自家翼胛下个毛；也知得原來做鸚哥个主人愛盡用心，同佢照顧好勢。佢到底係快樂抑係悲傷？係發譴抑係緊張？係肚枵抑係嘴渴？甚至，佢係毋係會愠悴？都愛耐心同佢做伴，恁樣正會人鳥兩相安哪。

<sup>5</sup> 伊麗莎白頸圈：音 i' li' sa' pag giang' kien'；伊麗莎白頸圈。一種由動物穿戴的保護性醫療器械，形狀為截錐形，用於防止動物啃咬或舔舐正在癒合的患部。

【長薯仔】徐秀英原作

前一駁仔鼻公頭哼出一粒長薯仔，又紅又腫，當徑眼<sup>1</sup>又動佢毋得，一恁著愛帶等佢出出入入，心情都煩躁起來吔！學生仔儕讀書壓力大，長透目無好睡足，有人講係火氣大引起个，有人講係面無洗淨正會恁樣，毋過，同學都知，這係後生人个專利，記錄佢兜个青春。長薯仔，又安到青春痘。

長薯仔係得人畏个違章建築，就像係該平平个路面翹起來个人孔蓋，像係該光滑个球面撇毋下去个嘜風嘴。係歸面仔生到密密又貢膿，這時節定著愛注意感染个風險，係無正經就會分佢搵到無結無煞，就驚一無注意生來白幼个面，嘎變做礫礫矻矻个「月球表面」，到時節自家就愛刻耐仔「歇月球」咧。

為著愛打敗長薯仔這外星人个攻擊，佢決定進行作戰計劃，經驗豐富个阿姆，順利登上指揮官个大位。因為鼻公頭該粒最大粒最痛，旨熟又掙毋得，阿姆就拿出厥秘密武器——綠豆粉同蜂糖。佢同這兩項攪共下，膏在佢个鼻公頭，佢問阿姆講，鼻公會分蟻公扛走無？阿姆緊噓緊視佢應講：「佢頭擺就係恁仔膏好

个，比起你這下个樣相，仰仔就毋會較慘啦！」。

阿姆又講，做毋得食忒躁个東西，火氣大長薯仔正會緊噓。偈同同學下課个時節，固定會去賣鹽酥雞个攤仔買雞排，炸到酥酥香香个雞排，淨恁就會害人流口涎，過再講愛趕等上暗晡頭个課，雞排就係當多學生仔當好个選擇。阿姆不時交代毋好緊食這兜有个無个，買隻麵包先砣肚，轉來正食正餐乜做得。毋過，就係當難掌這張嘴啊！為著自家一面个春光，偈心想，死馬做生馬醫，就聽阿姆个好哩！順續仔，乜來調整一下自家个飲食習慣。阿姆个秘密武器毋單淨有綠豆粉同蜂糖，還有笏瓜仔、蘆薈、黃連、菊花茶這兜，膏个食个樣樣齊。

逐暗晡洗好身到睡目个一細段時間，偈會搞手機仔放鬆心情，這時節，有責任心个指揮官——阿姆，定著會來推門。門外該片阿姆大聲放送：「無睡飽，長薯仔斯毋會好哦！」雖然抗痘个過程有息把仔難耐<sup>2</sup>，好得，這下吾面斯緊來緊亮<sup>3</sup>哩啲！

<sup>1</sup> 徑眼：音 gang ngien；礙眼。

<sup>2</sup> 難耐：音 nai<sup>ˇ</sup> ngai；難以忍受。

<sup>3</sup> 亮：音 lang；平整亮麗。

【老屋屋下个風景】蕭瑞琪原作

臨晝邊，轉去老屋屋下遶遶仔。一行落屋肚，看著阿爸坐在矮凳仔町，報紙放在矮桌仔頂，棚等目鏡<sup>1</sup>在該看國家大事；阿姆坐在竹交椅町，腳架在細矮圓凳頂高，目聚聚仔看等家庭副刊。日頭花對窗門斜斜晟落屋肚，恬靜恬靜，睡在桌頂个烏貓仔，兩隻腳還擡等報紙在該睡目，分佢个打門聲嚇一下，擘開目珠懶懶仔看過來，又續等睡佢个目。

老屋屋下有三條貓仔，全都係路脣拈來个。該兩時還係細貓子，正開目<sup>2</sup>無幾多日，分人用紙箱仔張等放在路脣草墩町。阿爸散步經過，聽著細細个喵！喵！喵聲，正發現這兜衰過个細貓子。佢斯摻細貓子帶轉屋下，倒一息牛乳在盤肚，細貓子鼻著牛乳味，搖搖擺擺爬到盤仔脣，用軟軟个舌嫵緊舐，牛乳還膏到鬍鬚斯變白鬚咧，當得人惜。三條貓子个毛色無共樣，一條像乳牛一搭烏一搭白，尤其四隻腳个腳趾頭前白白，當像著白襪樣，就摻佢安名「細白襪」；另外一條全身係烏金烏金个長毛，就喊佢「長毛仔」；還有一條生著柑仔色，又有一浪一浪个花紋，就安

到「細柑仔」。毋過阿姆無恁大神氣<sup>3</sup>記佢兜个名仔，就喊佢兜「花花个」、「長毛个」、「黃黃个」。

細貓子日見日大，變做活潑个大貓仔，長下會自家開窗門走出去遊遊野野，等到搞恁咧正對窗門鑽落來。貓仔本成係貓科動物，摻獅仔共樣有打獵个本等，雖然經過一萬年个馴化咧，但係本能無完全消失。所以，暗晡頭時常會走出去捉老鼠、透地龍、壁蛇仔，轉來放在門口；日時頭還會在陽臺晡鳥仔，見擺係看著佢恬索索仔跔在該，目金金仔看等屋頂，總會有飛毋掣个禾鷄仔、斑鳩、月鴿仔分佢打下來。

這駁仔轉去老屋屋下，總會看著三條貓仔目絲絲在該啄目睡，阿姆講：「這兜貓仔老咧，無幾好出去奈咧，逐日橫在屋肚睡目。」係照貓仔个年紀來算，佢兜也係高齡貓咧，逐朝晨，兩個看報紙个老人家摻三條啄目睡个老貓仔，就係老屋屋下个風景。

<sup>1</sup> 棚等目鏡：音 pang` nen´ mug giangˇ；戴眼鏡，以裝氣派。

<sup>2</sup> 開目：音 koi` mug；動物初次張開眼睛。

<sup>3</sup> 恁大神氣：音 an´ tai+ shin hiˇ；很費神。

112 年全國語文競賽客家語朗讀文章高中學生組（海陸腔）

編號 8 號

【一雙箸】黃秋枝原作

「好撿碗箸咧！」

佢俚係用箸个民族，從細就愛學會擎箸，學會擎箸之前，係爺哀挾分佢俚食。旨盡會使箸食飯該下，箸擎等搵上搵下，因為無熟絡划飯挾菜个技巧，嘎挾到叭叭跌；等到會使箸該下，又好擲擲仔這挾該挾，挾到歸碗自家一等好食个菜。

屋下世大人長下教講：「箸毋好恁精！好食个東西愛曉得勻等來大家食。」阿姆乜教講，箸係有生目珠个，佢俚想食哪樣就看準準正挾，毋好操起操轉<sup>1</sup>、搵上搵下，愛注重衛生摺禮貌正好。還有，食飯時節，箸愛擎正來，愛遵守擎箸个規矩，千萬做毋得用箸敲碗、敲桌仔像乞食仔討食樣；手指公摺指人指愛夾核箸个上截，另外三隻手指自然彎彎對齊摺箸捉好勢，指人指毋好搵起來像指等人罵樣；毋好咬箸；箸乜做毋得插在飯碗个中央；食飯擎箸有盡多禁忌，毋好準搞。係無，世大人就會大聲哆：「無人教詔<sup>2</sup>係無？」過較嚴條个，就箸頭嫵敲啊去，該餐飯乜有可能分世大人咄下桌。

<sup>1</sup> 操起操轉：音 cau<sup>ˇ</sup> hi<sup>ˇ</sup> cau<sup>ˇ</sup> zhon<sup>ˊ</sup>；翻動來翻動去。

<sup>2</sup> 教詔：音 gau<sup>ˇ</sup> zhau<sup>ˋ</sup>；教養、管教。

盡記得，細人時節偈屋下个箸係竹仔做个，阿姆長透吩咐，好天个時節箸愛拿到日頭下晒，係無斯會上烏雞<sup>3</sup>，愛落嘴个東西儘採毋得，愛知「病對嘴入，禍對口出」个道理。所以，細人時，晒箸乜係偈个頭路，一支一支頭對頭、尾對尾排好勢拿到天下晒日頭。

頭擺人，留人客在屋下食飯乜會講：「糯米打糝罕得幾多時？便菜飯乜就加一雙『箸』定定。」斯愛人情好，食水乜甜，一雙「箸」增添了人摺人之間个交流摺感情。還記得，有一擺愛敬床公婆搵擺菜盤，偈就照佢俚食飯个規矩準備一雙箸，阿姆遽遽喊講摺箸拿轉去，相傳，敬床公婆毋使擎箸，係擎箸敬床公婆，床公婆會拿箸教示細人仔這種生趣个講法。

人講，箸一頭圓、一頭方就像天圓地方；手擎箸五隻手指愛上、中、下配合使用，代表天、地、人三才；箸一分為二，又合二為一，代表陰陽結合，包容、平衡、和諧。

<sup>3</sup> 上烏雞：音 shong<sup>ˋ</sup> vu<sup>ˋ</sup> gai<sup>ˋ</sup>；物品因潮溼發霉而產生的黑點。

編號 9 號

【細日頭】胡明華原作

細日頭係阿生畜个鸚哥<sup>1</sup>，兩片面頰卵有紅紅个圓箍仔，看起來就像細細个日頭，所以喊佢「細日頭」。佢个臉身白白，尾長長，頭那頂有一撮長長、黃黃梳到腦屎背个頭那毛，身形盡靚。

細日頭在鳥子時節就分阿生對店肚接到屋下，從佢歸身無毛軟頭扁摺<sup>2</sup>到翼胛毛生到亮亮齊齊，最親个就係阿生，見看著阿生，佢就歡喜塵天，暢到耐毋得，啾啾滾緊唱歌。佢長透企在阿生个拈食指<sup>3</sup>抑係肩頭頂高，不時佷兼來，用嘴輕輕仔啄阿生个面，西出一細截舌嫵咬佢，成時還會咬到耳砵去，乜長下在佢臉身脣迂來迂去，實在生趣。有一擺，阿生翕一張細日頭咬佢个面个自拍相片，細日頭看啊著，嘎又再過咬加一到，屋下人笑到貶轉來。

細日頭个毛正生齊个時節，識飛走一擺。該日阿生毋知哪條腸仔毋直，攞等鳥籠仔去公園，學人放鳥仔，妄想細日頭飛出去做得嘍佢再過飛轉來，又合想愛展風神。無想著鳥籠仔正打啊開

來，細日頭翼玻玻仔，黏時就飛到十二樓恁高，跔等就無影無跡咧。阿生心焦馬亂<sup>4</sup>，仰會尋去尋轉都尋無？佢歸暗晡睡毋落覺，天官光就緊拚拚仔再過去公園尋。佢有聲喊到無聲，嘴又燥肚又渴。好得皇天不負苦心人，包尾分環保人員在一頭樹頂尋著，一人一鳥正又過相逢。

前一駁仔，阿生試著細日頭大咧，就無細心照顧，斯顧自家个事，陪佢个時間緊來緊少。麼人知細日頭嘎開始背自家个毛，到有一日，兩片翼胛下總下擲到淨淨，就像人發病仔頭那啟毛光頂樣，這時阿生正緊張起來，遽遽送去鳥仔醫院。衰過正得啊！藥錢比人看病還較貴！

人講「戇戇戇，豬肉煮米醬；精精精，無屋好居身。」阿生原旦還話著自家一等精，省忒陪細日頭个時間就賺著時間趕事，毋會仰般，結果害了細日頭，乜害著自家，正經係假精無錢賺。

這擺阿生學乖咧，開始認真照顧細日頭，還分佢戴伊麗莎白頸圈，避免佢又過咬翼胛下；乜知得原來做鸚哥个主人愛用心照顧好勢；不管佢到底係快樂抑係悲傷？係發悶也係緊張？係肚屎枵抑係嘴渴？甚至，佢係毋係慍悴？都愛耐心做伴，恁樣正會人鳥兩相安哪！

<sup>1</sup> 鸚哥：音 en` go`；鸚鵡。

<sup>2</sup> 軟頭扁摺：音 ngion` teu bien` zhab；此處指初生時長得醜醜的、皮膚皺皺的樣子。

<sup>3</sup> 拈食指：音 ngiam` shid` zhi`；食指。

<sup>4</sup> 心焦馬亂：音 sim` ziau` ma` lon+；心中慌亂無主。

【長薯仔】徐秀英原作

前一駁仔鼻空頭髮一隻長薯仔，又紅又腫，當杈眼<sup>1</sup>又動佢毋得，一想著愛帶等佢出出入入，心情都煩躁起來！做學生仔儕功課壓力大，長透目無好睡恁足，有人講係火氣大引起个，有人講係面無洗淨，毋過，同學都知，這係後生人个專利，記錄佢兜个青春，長薯仔个名又安到青春痘。

長薯仔係得人畏个違章建築，就像在該平整个路面翹起來个「人孔蓋」；像光滑个球仔面頂該粒撇毋下去个嘜風嘴。若係歸面生到密密又貢膿，這時節定著愛注意感染个風險，係無正經就會分佢搵到無結無煞，斯驚一無注意，生著白幼个面變成礫礫砵砵个「月球表面」，到該時節，自家就刻耐仔「戴月球」咧。

為著愛打敗長薯仔外星人个攻擊，佢決定進行作戰計劃，經驗豐富个阿姆，順利登上指揮官个大位。因為鼻空頭該隻最大隻、最痛，盲熟又撇毋得个長薯仔，阿姆拿出佢个秘密武器，用綠豆粉摻蜂糖兩項攪共下，膏在佢个鼻空頭，佢問阿姆講，鼻空會分蟻公扛走無？阿姆緊笑緊瞞<sup>2</sup>佢應講：「佢頭擺就係恁樣膏好

个，比起你這下个樣仔還較慘哦！」。

阿姆又講，食个東西做毋得忒躁，火氣大長薯仔正會緊發。佢摻同學下課个時節，固定會去賣鹽酥雞个攤仔買雞排，焗到酥酥、香香个雞排，單淨想著就會流口水，尤其愛赴暗晡頭个課，雞排係當多學生仔最好个選擇。阿姆長下交代毋好緊食這兜有个無个，買隻麵包先打肚底，轉來正食正餐乜做得。毋過，就係當難管這張嘴啊！為著自家一面个春光，佢心肝肚想，死馬當做生馬醫，就聽阿姆个好咧！乜來調整一下飲食个習慣。阿姆个秘密武器毋單淨綠豆粉摻蜂糖，還有笏瓜、油蔥<sup>3</sup>、黃連，菊花茶……，膏个、食个樣樣齊。

逐暗晡洗好身到睡目个一細段時間，佢會搞手機放鬆心情。這時節，有責任心个指揮官——阿姆，定著會來推門，佢在門背大聲放送：「無睡飽，長薯仔毋會好哦！」雖然抗痘个過程有息仔難耐，好得，佢這下个面有緊來緊亮線咧。

<sup>1</sup> 杈眼：音 ca<sup>+</sup> ngan<sup>ˊ</sup>；礙眼。

<sup>2</sup> 瞞：音 him；瞪人。

<sup>3</sup> 油蔥：音 rhiu cung<sup>ˋ</sup>；蘆薈。

【老屋个風景】蕭瑞琪原作

半晝邊，轉去老屋遶遶嚟。一行入屋肚，看著阿爸坐在矮凳項，報紙攤在矮桌面，佢棚<sup>1</sup>緊目鏡在該看國家大事；阿姆坐在竹椅項，腳架在細矮圓凳項，目聚聚在看家庭副刊。日頭花對窗門斜斜戙入屋肚恬靜恬靜，眠在桌頂項个烏貓兩隻腳還揸緊報紙在該睡目，分吾个打門聲嚇下，擘開目珠懶懶看過來，又眠倒轉去繼續睡厥目。

老屋有三隻貓，做下係路脣拈轉來个。該當時還係細貓子，正擘開目無幾日，分人用紙箱張緊抨在路脣草墩項。阿爸散步經過，聽著細細个喵！喵！喵聲，正發現這兜衰過个細貓子。阿爸將細貓子帶轉屋家，倒一屑牛乳在盤肚，細貓子鼻著牛乳味，搖搖擺擺爬到盤脣，用軟軟个舌嫵緊舐，牛乳還膏在鬍鬚項變白鬚，當得人惜。三隻貓子个毛色無共樣，一隻像乳牛一搭烏一搭白，尤其四隻腳个腳趾頭前白白，已像著白襪个樣，斯同佢安名「細白襪」；另外一隻歸身係烏金烏金个長毛，斯喊佢做「長毛」；還有一隻係柑色个，又有一浪一浪个花紋，斯安做「細

柑」。毋過阿姆無恁大神氣記厥等个名，斯喊厥等「花花个」、「長毛个」、「黃黃个」。

細貓日見日大，變做活跳个大貓，不時會自家開窗門走出去野上野下，等到野瘰咧正對窗門鑽入來。貓本成係貓科動物，同獅共樣有打獵个本等，雖然經過一萬年个馴化，毋過本性無完全消失。因致，暗晡頭輒輒會走出去打老鼠、透地龍、壁蛇轉來放在門頭前；日時頭還會在陽臺晡鳥，見擺若係看著佢恬苟苟跔在該，目金金相緊屋頂，總會有飛毋掣个禾鷄、斑鳩、月鴿畀打落來。

這駁轉去老屋，總會看著三隻貓目絲絲在該啄目睡，阿姆講：「這兜貓老哩啲，無已好出去寮咧，逐日眠在屋肚睡目。」若係照貓个年紀數算，厥等也係高齡貓咧，逐朝脣兩個看報紙个老人家同三隻啄目睡个老貓斯係老屋个風景。

<sup>1</sup> 棚：音 pang+；戴。

112 年全國語文競賽客家語朗讀文章高中學生組（大埔腔）

編號 8 號

### 【一雙筷】黃秋枝原作

「好撿碗筷哦！」

佢係用筷个民族，自細斯愛學曉擎筷，學曉擎筷之前爺哀挾分佢食，佢已會使筷食飯進前，筷擎緊翹上翹下，因致無熟絡划飯挾菜个技巧，嘎挾去浴浴跌；等到會使筷該下，又好擲擲這挾該挾，挾都歸碗自家一等好食个菜類。

屋家世大人長在教講：「筷毋好恁精！好食个東西愛曉得勻核來大家食。」阿姆也教講，筷係有生目珠个，佢人想食哪樣斯看準準挾起來，毋好操去操轉搨上搨落，愛注重衛生同禮貌正好。還有，食飯个時節，筷愛擎正來，也愛遵守擎筷个規矩，千萬使毋得用筷敲碗、敲桌像乞食討食个樣；手指公同指人指愛夾核筷个上截，另外三隻手指自然彎彎對齊，夾好筷个兩頭，指人指毋好翹起來像指緊人罵樣；毋好咬筷；筷也使毋得插在飯碗个中央；食飯時拿筷準賭搞這兜禁忌。

若無，世大人斯會大聲哆：「無人教招係無？」過較嚴條个，筷頭斯掃啊去罰細人，該餐飯也有可能分世大人喝落桌。

當記得，還細時節吾屋家个筷，係竹做个，阿姆長在吩咐，

好天个時節筷愛拿到日頭下晒，若無斯會生菇上烏點，愛落嘴个東西儘採毋得，愛知「病對嘴入，禍從口出」个道理。因致，還細時節，晒筷也係吾个頭路，一支一支頭對頭、尾對尾，擺開來拿到日頭下晒。

頭擺人，勾挽人客在屋家食飯也會講：「糯米打糝罕得幾多時？便菜飯也斯加一雙『筷』忒等。」淨愛人情好，食水也甜，一雙「筷」加添人同人之間个交流同感情。還記得，有一擺愛敬床公婆搨擺菜盤，佢照佢人食飯个規矩準備一雙筷，阿姆遽遽喊講同筷拿走，相傳，敬床公婆毋使擎筷，若係擎筷敬床公婆，床公婆會拿筷教示細人這種生趣个講法。

人講，筷一頭圓一頭方斯像天圓地方；手擎筷五隻手指愛上中下配合來使，代表天地人三才；筷一分為二，又合二為一，代表陰陽結合，包容、平衡、和諧。

## 112 年全國語文競賽客家語朗讀文章高中學生組（大埔腔）

編號 9 號

### 【細日頭】胡明華原作

細日頭係阿生畜个鸚哥，兩片面頰卵有紅啾啾个圓箍，看跣來斯像細細个日頭，因致安佢「細日頭」。厥圓身白白，尾長長，頂頂有一撮長長黃黃梳到腦屎背个頭那毛，身裝當靚。

細日頭細鳥時節斯分阿生對店項接到屋家，自佢歸身無毛軟頭扁摺<sup>1</sup>，到翼胛毛生去亮亮齊齊，盡親个斯係阿生，見看著阿生，佢斯歡喜轟天，暢都耐毋得，啾啾滾緊唱歌。佢長在企在阿生个拈食指抑係肩頭項，不時佢兼來，用嘴輕輕啣阿生个面，啣出一細截舌嫵咬佢，成半下還會咬著耳砵，迂來迂去，實在生趣。有一擺，阿生翕一張細日頭咬厥面个自拍相片，細日頭看啊著，嘎又過嘎加一到，屋家人笑都眨轉來。

細日頭个毛正生齊个時節，識飛走一擺。該日阿生毋知哪條腸毋直，攞緊鳥籠去公園，學人放鳥，望想嘍細日頭飛出去過飛轉來，望想展風神。無想著鳥籠正打啊開，細日頭翼披披，兩下半斯飛到十二樓恁高，跔緊斯無魂無影咧。阿生急都無結無煞，仰會尋去尋轉都尋無？佢歸暗晡睡毋落覺，天旨光斯緊拚拚過去

<sup>1</sup> 軟頭扁摺：音 ngion+ teuˊ bienˊ zhabˊ；此處指初生時長得醜醜的、皮膚皺皺的樣子。

公園尋。佢有聲喊到無聲，嘴又燥肚又渴。好得皇天不負苦心人，臨尾分環保人員在一頭樹頂尋著，一人一鳥正過再相逢。

前一駁，阿生試著細日頭大咧，斯無恁注意照顧，淨顧自家个事，陪佢个時間緊來緊少。麼人知細日頭嘎開始啣自家个毛，到有一日，兩片翼胛下總下畀啣淨淨，斯像人破病，頭那毛啟光共樣共樣，這時節阿生正緊張起來，遽遽送去鳥醫院。衰過正得啊！藥錢比人看病還較貴！

人講「惹惹惹，豬肉煮米醬；精精精，無屋好居身。」阿生原旦還佬著自家一等精，省撇陪細日頭个時間，斯賺著時間趕事，毋會仰脣，結果害著細日頭，乜害著自家，正經係假精無錢賺。

這擺阿生學乖咧，開始認真照顧細日頭，還分佢戴伊麗莎白頸圍<sup>2</sup>，免致佢過再咬翼胛下；乜知得原來做鸚哥个主人愛當用心，照顧好勢；不管佢到底係快樂抑係悲傷？係發譴抑係緊張？係肚枵抑係嘴渴？甚至，佢係毋係愠悴？都愛耐心做伴，恁泥正會人鳥兩相安。

<sup>2</sup> 伊麗莎白頸圍：音 i+ liˊ sa+ pagˊ giangˊ vuiˊ；一種圓形中空套在寵物脖子上，用來防止寵物抓或咬傷身體的項圍。。

【長薯】徐秀英原作

前一駁鼻公頭啱出一粒長薯，又紅又腫，當逆眼<sup>1</sup>又動毋得，一恸著愛帶核佢出出入入，心情都煩躁起來咧！學生儕功課壓力大，長在目無好睡恁足，有人講係火氣大引起，有人講係面無洗淨，毋過，同學都知，這係後生人个專利，記錄吾等个青春，因致長薯个名又安做青春痘。

長薯係得人畏个違章建築，斯像在該平順个路面翹起來个人孔蓋；像光滑个球面頂該粒搵毋落去个嘍風嘴。若係歸面生去密密又貢膿，這時節定著愛注意感染个風險，若無正經斯會分佢搵去無結無煞，斯驚一無注意生在白幼个面項，嘎變做礫礫砣砣个「月球表面」，到該時節自家斯高不將刻耐「戴月球」咧。

為著愛同長薯這外星人个攻擊輸贏，佢決定進行作戰計劃，經驗豐富个阿姆，順利坐上指揮官个大位。因致鼻公頭該粒盡大粒盡疾，盲熟又極毋得<sup>2</sup>，阿姆拿出厥秘密武器：綠豆粉同蜂糖，佢同這兩項攪共下，膏在吾个鼻公頭，佢同阿姆講，鼻公會分蟻公扛走無？阿姆緊笑緊視佢應講：「佢頭擺斯恁泥膏好个，比得

<sup>1</sup> 逆眼：音 ngiag` ngien^；礙眼。

<sup>2</sup> 極毋得：音 kid` m` ded^；不能擠壓。

你這下个樣，仰脣都毋會較慘啦！」。

阿姆又講，食个東西使毋得忒躁，火氣大長薯正會緊啱。佢同同學下課个時節，固定會去賣鹽酥雞个攤買雞排，炸去酥酥香香个雞排，單淨恁著斯會流口涎，過再愛趕上暗晡頭个課，雞排係當多學生已好个選擇。阿姆不時交代毋好緊食這兜有个無个，買一坵麵包先砣肚屎，轉來正食正餐乜使得。毋過，斯係當難管好這張嘴啊！為著自家頭面个春光，吾心肝肚想，死馬做生馬醫，斯聽阿姆个好咧！乜來調整一下飲食个習慣。阿姆个秘密武器毋單淨綠豆粉同蜂糖，還有笏瓜、油蔥<sup>3</sup>、黃連，菊花茶……，膏个食个樣樣齊。

逐暗晡洗好身腳到睡目个一細段時間，佢會搞手機放冗心情。這時節，登真个指揮官——阿姆，定著會來推門，門个該片阿姆大聲放送：「目睡毋罅，長薯毋會好哦！」雖然抗痘个過程有兜難耐<sup>4</sup>，好得，佢這下个面有緊來緊光滑咧。

<sup>3</sup> 油蔥：音 rhiu` cung+；蘆薈。

<sup>4</sup> 難耐：音 nan` ngai`；難以忍受。

【老屋下个風景】蕭瑞琪原作

半晝邊，轉去老屋下遶遶啊。一行入屋裡背，阿爸坐在矮凳仔，報紙放在矮桌仔面，棚等目鏡在該睭國家大事；阿姆坐在竹交椅，腳架在細矮圓凳，目聚聚仔睭等家庭副刊。日頭花對窗門斜斜箭入，屋肚恬靜恬靜，伏在桌頂个烏貓仔兩隻腳還撇等報紙在該睡，分个打門聲嚇著一下，擘開目珠懶懶仔睭過來，又伏轉去繼續睡个目。

老屋下有三條貓仔，全都係路脣拈來个。該當時還係細貓子，正開目<sup>1</sup>無幾日，分人用紙箱仔張等放在路脣草埔肚。阿爸散步經過，聽著細細仔喵！喵！喵个聲，正發現這兜衰過个細貓子。阿爸將細貓子帶轉屋下，滄一息牛乳在盤仔，細貓子鼻著牛乳味，搖搖擺擺<sup>2</sup>爬到盤仔脣，用軟軟个舌嫵緊舐，牛乳還膏在鬍鬚變白鬚仔，當得人惜。三條貓子个毛色無共樣，一條像乳牛一搭烏一搭白，尤其四隻腳个腳趾頭前白白，當像著白襪樣仔，就膠佢安名「細白襪」；另外一隻全身係烏金烏金个長毛，就喊佢

「長毛仔」；還有一條生著柑仔色，又有一浪一浪个花紋，就安到「細柑仔」。毋過阿姆無恁大神氣<sup>3</sup>記佢兜个名仔，就喊佢兜「花花个」、「長毛个」、「黃黃个」。

細貓仔日見日大，變成活跳个大貓仔，不時會自家開窗門走出去野上野下，等到野恁了正對窗門鑽入來。貓仔本成係貓科動物，膠獅仔共樣有打獵个本能，雖然經過了一萬年个馴化，但係本能無完全消失。所以，暗晡頭時常會走出去打老鼠、透地龍、壁蛇仔轉來放在門頭前；日時頭還會在陽臺晡鳥仔，見擺係睭著佢恬索索仔跔在該，目金金仔睭等屋頂，總會有飛毋掣个禾鸚仔、斑鳩仔、月鴿仔分佢打下來。

這駁仔轉去老屋下，總會睭著三條貓仔目絲絲在該啄目睡，阿姆講：「這兜貓仔老了喲，毋多好出去寮了，逐日伏在屋肚睡。」係照貓仔个年紀來算，佢兜也係高齡貓了，逐晨早兩個睭報紙个老人家膠三條啄目睡个老貓仔就係老屋下个風景。

<sup>1</sup> 開目：音 koiˋ mugˋ；動物初次張開眼睛。

<sup>2</sup> 搖搖擺擺：音 rhiau rhiau baiˋ baiˋ / rhiauˋ rhiauˋ baiˋ baiˋ / iauˋ iauˋ baiˋ baiˋ；搖搖晃晃。

<sup>3</sup> 恁大神氣：音 anˋ taiˋ shin hiˋ / anˋ taiˋ sinˋ kiˋ / anˋ taiˋ siinˋ hiˋ；很費神。

112 年全國語文競賽客家語朗讀文章高中學生組（饒平腔）

編號 8 號

### 【一雙箸】黃秋枝原作

「好撿碗箸哦！」

佢係用箸个民族，從細就愛學會擎箸，愛學會擎箸之前爺哀挾食分佢，旨盡會使箸食飯以前，箸擎等搵上搵下，因為無熟絡划飯挾菜个技巧，嘎挾到浴浴跌；等到會使箸該下，又好擲擲仔這挾該挾，挾到歸碗係自家一等好食个菜。

屋下世大人長透教講：「箸毋好恁精！好食个東西愛曉得勻等來大家食。」阿姆乜教講，箸係有生目珠个，佢俚想食哪樣就睺準準挾啊起，毋好操去操轉搵上搵下，愛注重衛生摺禮貌正好。還有，食飯時節，箸愛擎正來，愛遵守擎箸个規矩，千萬做毋得用箸敲碗、敲桌仔像乞食仔討食樣；手指公摺指人指愛夾核箸个上截，另外三隻手指自然彎曲對齊，夾好箸个兩頭，指人指毋好搵起來像指等人罵樣；毋好咬箸；箸乜做毋得插在飯碗个中央；食飯提等箸準賭爽這兜禁忌。

係無，世大人就會大聲咄：「無人教詔係無？」過較嚴條个，無就箸頭嫲摺啊去，該餐飯乜有可能分世大人喝下桌。

盡記得，細時節佢屋下个箸，係竹仔做个，阿姆長透吩咐，

好天个時節箸愛提到日頭下炙，係無斯會生菇上烏點，愛落嘴个東西儘採毋得，愛知「病對嘴入，禍對口出」个道理。所以，還細時，炙箸乜係佢个頭路，一支一支仔頭對頭、尾對尾，擺開來提到天下炙日頭。

頭擺人，勾挽人客在屋下過餐乜會講：「糯米打糝罕得幾多時？便菜飯仔乜就加一雙『箸』定定。」斯愛人情好，食水乜甜，一雙「箸」增添了人摺人之間个交流摺感情。還記得，有一擺愛敬床公婆搵擺菜盤，佢就照佢俚食飯个規矩準備一雙箸，阿姆遽遽喊講摺箸提轉去，相傳，敬床公婆毋使擎箸，係擎箸敬床公婆，床公婆會提箸教示細人仔這種心色个講法。

人講，箸一頭圓一頭方就像天圓地方；手擎箸五隻手指愛上中下配合使用，代表天地人三才；箸一分為二，又合二為一，代表陰陽結合，包容、平衡、和諧。

【細日頭】胡明華原作

細日頭係阿生畜个鸚哥<sup>1</sup>，兩片面頰卵有紅叨叨个圓箍仔，睺起來就像細細个日頭，所以安佢「細日頭」。佢臉身白白，尾長長，頂高有一抓長長黃黃梳到腦屎背个頭那毛，身形盡靚。

細日頭幼鳥時節就分阿生對店項接到屋下，從佢歸身無毛軟頭扁摺<sup>2</sup>到翼胛毛生到亮亮齊齊，最親个就係阿生，見睺著阿生，佢就歡喜靈天，暢到耐毋得<sup>3</sup>，啾啾滾緊唱歌。佢長透企在阿生个拈食指<sup>4</sup>抑係肩頭頂，不時佷兼來，用嘴輕輕仔啄阿生个面，啗出一細截舌嫵啖阿生，有時還會啖到耳砵，迂來迂去，實在心色。有一擺，阿生翕一張細日頭啖佢面个自拍相片，細日頭睺啊著，嘎又再過啖加一到，屋下人笑到貶轉來。

細日頭个毛正生齊个時節，識飛走一擺。該日阿生毋知哪條腸仔毋直<sup>5</sup>，攞等鳥籠去公園，學人放鳥仔，望想嘍細日頭飛出去

<sup>1</sup> 鸚哥：音 enˋ goˋ；鸚鵡。

<sup>2</sup> 軟頭扁摺：音 ngienˋ teu bienˋ zhabˋ / ngienˋ teuˋ benˋ zabˋ / ngienˋ teuˋ bienˋ zabˋ；此處指初生時長得醜醜的、皮膚皺皺的樣子。

<sup>3</sup> 暢到耐毋得：音 tiongˋ doˋ naiˋ m dedˋ / tiongˋ doˋ naiˋ mˋ dedˋ；高興得不得了。

<sup>4</sup> 拈食指：音 ngiamˋ shed zhiˋ / ngiamˋ sed ziˋ / ngiamˋ siid ziiˋ；食指。

<sup>5</sup> 毋知哪條腸仔毋直：音 m diˋ niˋ tiau chong erˋ m chid / mˋ diˋ niˋ tiauˋ congˋ mˋ cid / mˋ diˋ niˋ tiauˋ congˋ eˋ mˋ ciid；不知怎麼了。

再過飛轉來，想愛展風神。無想著鳥籠仔正打啊開來，細日頭翼撇撇仔，兩下半就飛到十二樓恁高，跔等就無魂無影了。阿生心焦到無結無煞，仰般形尋去尋轉都尋無？佢歸暗晡睡毋落覺，天盲光就緊拚拚仔再去公園尋。佢有聲喊到無聲，嘴又燥肚又渴。好得皇天不負苦心人，包尾分環保人員在一頭樹頂尋著，一人一鳥正再過相逢。

前一駁仔，阿生試著細日頭大了，就無注意照顧，淨顧自家个事，陪佢个時間緊來緊少。麼人知細日頭嘎開始背自家个毛，貼貼到有一日，兩片翼胛下總下擲到淨淨，就像人發病仔頭那敲毛光頭共樣共樣，這時阿生正緊張起來，遽遽送去鳥仔醫院。衰過正得啊！藥錢比人睺病還較貴！

人講「戇戇戇，豬肉煮米醬；精精精，無屋好居身。」阿生原旦還話著自家一等精，省忒陪細日頭个時間就賺著時間趕事，毋會仰般，結果害了細日頭，也害著自家，正經係假精無錢賺。

這擺阿生學乖了，開始認真照顧細日頭，還分佢戴伊麗莎白頸圍<sup>6</sup>，避免佢再過咬翼胛下；也知得原來做鸚哥个主人愛盡用心，照顧好勢；不管佢到底係快樂也係悲傷？係發闕也係緊張？係肚枵也係嘴渴？甚至，佢係毋係愠悴？都愛耐心做伴，恁樣正會人鳥兩相安哪。

<sup>6</sup> 伊麗莎白頸圍：音 iˋ li saˋ pag giangˋ vuiˋ / iˋ li saˋ pag giangˋ vuiˋ；一種圓形中空套在寵物脖子上，用來防止寵物抓或咬傷身體的項圈。

【長薯仔】徐秀英原作

前一駁仔鼻空頭哼出一粒長薯仔，又紅又腫，當杈眼<sup>1</sup>又動毋得，一想著愛帶等佢出出入入，心情都煩躁起來了！做學生仔儕功課讀書壓力大，長透目無好睡恁足，有人講係火氣大引起，有人講係面無洗淨，毋過，同學都知，這係後生人个專利，專專記錄大家个青春，所以，長薯仔又安到青春痘。

長薯仔係得人畏个違章建築，就像在該亮亮个路面翹起來个水空蓋；像光滑个球面頂該粒撇毋下去个嘍風嘴。係歸面生到密密又貢膿，這時節定著愛注意感染个風險，係無正經就會分佢搵到無結無煞，就驚一無注意，生著白幼个面分外星人尖去戴，嘎變做礫礫砣砣个「月球表面」，到時節自家就只好刻耐仔「戴月球」了。

為著愛膠長薯仔外星人相輸贏，佢決定進行作戰計劃，經驗豐富个阿姆，順利登上指揮官个大位。因為鼻空頭該粒最大粒最疾，旨熟又及毋得<sup>2</sup>，阿姆提出佢个秘密武器，綠豆粉膠蜂糖，佢膠這兩項攪共下，膏在佢个鼻空頭，佢膠阿姆講，鼻空會分蟻公

<sup>1</sup> 杈眼：音 ca` ngien` / ca` ngien^；礙眼。

<sup>2</sup> 及毋得：音 kib m ded` / kib m` ded`；擠壓。

扛走無？阿姆緊笑緊脛佢，應講：「佢頭擺就恁樣膏好个，你這下个樣仔，怕毋會比佢還較慘！」

阿姆又講，食个東西做毋得忒躁，火氣大長薯仔正會緊哼。佢膠同學下課个時節，固定會去賣鹽酥雞个攤仔買雞排，炸到酥酥香香个雞排，淨想就會流口涎，再過愛赴上暗晡頭个課，雞排係當多學生仔當好个選擇。阿姆不時交代毋好緊食這兜，係無買隻麵包先砣屎肚，轉來正食正餐乜做得。毋過，就係掌毋核這張嘴啊！為著自家一面个春光，佢心想，死牛準生馬醫，就聽阿姆个好了！乜來調整一下飲食个習慣。阿姆个秘密武器毋單淨綠豆粉膠蜂糖，笏瓜、油蔥、黃連，菊花茶……，膏个食个樣樣齊。

每暗晡洗好浴到睡个一細段時間，佢會爽手機仔放輕心情。這時節，盡心个指揮官——阿姆，定著會來推門，門个該片阿姆大聲放送：「睡毋罇，長薯仔毋會好哦！」雖然抗痘个過程有一息難耐<sup>3</sup>，好得，佢這下个面有緊來緊亮線了。

<sup>3</sup> 難耐：音 nai ngai` / nai` ngai；難以忍受。

112 年全國語文競賽客家語朗讀文章高中學生組（詔安腔）

編號 7 號

【舊屋下个風景】蕭瑞琪原作

半晝子，轉去舊屋下遶遶个。一行入屋內，阿怙坐在矮凳，報紙囧在矮桌竦，戴目鏡在睜國家大事；阿依坐在竹椅，腳跨在細矮圓凳，目眯眯睜家庭副刊。日頭光對窗門斜斜照入屋內恬靜恬靜，兩隻腳拗報紙摩蹠倒在桌竦睡个烏貓，得俚个開門聲嚇著，擘開目珠懶懶个睜過來，又隨倒倒轉去睡。

舊屋下有三隻貓，歸下攞係路脣撿轉來个。當時猶係貓么，正開目<sup>1</sup>無幾多日，得人用紙箱裝个囧在路脣草墩內。阿怙散步路過，聽著細細聲个喵！喵！喵个聲，正發現這兜苦憐个貓么。阿怙拗貓么撿轉屋下，漕一兜仔牛乳在盤，貓么鼻著牛乳味，搖搖擺擺爬到盤脣，用軟軟个舌直直西，牛乳膏在嘴鬚面上變白鬚，真得人惜。三隻貓么个毛色無共樣，一隻像乳牛一搭烏一搭白，尤其四隻腳个腳趾頭頭前白白，真像著白襪个樣，即拗佢喊做「細白襪」；另外一隻歸身係烏金烏金个長毛，即喊佢「長毛个」；猶有一隻生做柑子色，又有一浪一浪个花紋，就喊做「細柑子」。毋過阿依無恁大心命<sup>2</sup>記佢人个名，即喊佢人「花花

<sup>1</sup> 開目：音 koiˋ hmˊ；動物初次張開眼睛。

<sup>2</sup> 恁大心命：音 nginˋ tai simˋ miang；很費神。

个」、「長毛个」、「黃黃个」。

貓么一日一日大，變做活跳个大貓，不時會自家開窗門走出去走上走落，等到賞恁啊正對窗門鑽入來。貓本來係貓科動物，和獅共樣有打獵个本等，雖然經過一萬年个馴化，毋過本能無歸下消失。所以，暗頭不時會走出去捉老鼠、透地鼠<sup>3</sup>、飛蒂仔<sup>4</sup>轉來囧在門頭前；日時頭猶會在陽臺晡鳥，見擺若係睜著佢恬卒卒跔在遐，目金金睜著屋竦，總會有毋會赴飛走个禾鷄、鶉鴉、粉鳥得佢捉著。

這駁子轉去舊屋，總會睜著三隻貓目眯眯在遐啄睡，阿依講：「這兜貓老啊啦，無幾愛出去寮啊，逐日倒在屋內睡。」若照貓个年歲算，佢人嘛係高齡貓，逐晨早兩個睜報紙个老人家和三隻啄睡个老貓即係舊屋下个風景。

<sup>3</sup> 透地鼠：音 munˋ ti chiˋ；鼯鼠，又名「鼯地鼠」。

<sup>4</sup> 飛蒂仔：音 buiˋ diˋ aˋ；壁虎。

112 年全國語文競賽客家語朗讀文章高中學生組（詔安腔）

編號 8 號

### 【一雙箸】黃秋枝原作

「好排碗箸啊哦！」

佢係用箸个民族，自細就愛學會擎箸，學會擎箸進前爺哀挾得恩食，旨真會用箸食飯進前，箸擎毋會好勢，因為無真熟事划飯挾菜个技術，嘎挾到溶溶跌；等到會用箸遐下，又愛這挾遐挾，挾到歸碗自家一等愛食个菜。

屋下序大人長透教講：「箸毋好恁精！好食个物件愛知分甸<sup>1</sup>得大家食。」阿依嘛教講，箸係有生目珠个，佢人想討食哪件即相準準挾起來，毋好挾起來攔圓倒轉搵起搵落，愛注意衛生和禮貌正好。攔有，食飯个時，箸愛擎得佢正，愛遵守擎箸个規矩，千萬毋好用箸推碗、推桌像乞食分食恁；手指公和食指愛夾核箸个上截，另外三支手指自然彎對齊，夾好箸个兩頭，食指毋好翹起來像比人罵个樣；毋好咬箸；箸嘛毋會用插在飯碗个中央；食飯擎箸變把戲這兜禁忌。

若無，序大人就會大聲喝：「無教治係無？」攔較嚴格个，箸頭即掃落去，遐頓飯嘛有可能得序大人喝落桌。

真記得，細漢時佢屋下个箸，係竹做个，阿依長透吩咐，好天个時箸愛提去日頭下炙，若無即會生菇上烏點，討落嘴个物件毋會用儘採，愛知「病對嘴入，禍對口出」个道理。所以，細漢時，炙箸嘛係佢个頭路，一支一支頭對頭、尾對尾，排開提去坪中央炙日頭。

成過个人，留人客在屋下食飯嘛會講：「糯米打糝罕得幾多時？便菜飯就加一雙『箸』定。」正經係人情好，食水嘛甜，一雙「箸」加添了人和人之間个交流和感情。猶記得，有一擺討拜床公婆鬥排菜盤，佢即照佢人食飯个規矩準備一雙箸，阿依攔緊喊講拗箸提轉去，相傳，拜床公婆毋使擎箸，若係擎箸拜床公婆，床公婆會擎箸教示細子這種心色个講法。

人講，箸一頭圓一頭方，表示天圓地方；手擎箸五支手指愛上中下配合使用，表示天地人三才；箸一分做二，又合二做一，表示陰陽結合，包容、平衡、和諧。

<sup>1</sup> 分甸：音 bun<sup>ˇ</sup> pang<sup>ˇ</sup>；分配。

112 年全國語文競賽客家語朗讀文章高中學生組（詔安腔）

編號 9 號

【細日頭】胡明華原作

細日頭係阿生供个鸚哥<sup>1</sup>，兩裡面頰卵有紅紅个圓箍，睺起來即像細細个日頭，所以喊佢「細日頭」。佢臉身白白，尾長長，面上有一簇長長黃黃梳到後頭殼个頭那毛，身形真靚。

細日頭鳥么个時即得阿生對店內接到屋下，對佢歸身無毛軟摺摺到翼胛毛生到亮亮齊齊，頭親个即係阿生，見睺著阿生，佢即歡喜得天，暢到毋會奈，啾啾呖直直唱歌。佢長透企在阿生个食指抑係肩頭上，不時偎過來，用嘴輕輕啄阿生个面，西出一細截舌咬阿生，有時猶會咬到耳砵，咬來咬去，實在心色。有一擺，阿生翕一張細日頭咬厥面个自拍相片，細日頭睺著，竟然又擱加咬一擺，屋下人笑到搵落去。

細日頭个毛正生齊个時，識飛走一擺。遐日阿生毋知仰子啊，擱鳥籠去公園，學人放鳥，望想嘍細日頭飛出去擱飛轉來，望想展風神。無想著鳥籠正打開，細日頭翼撇撇，兩下半即飛到十二樓恁高，跔个即無影無跡啊。阿生心急到無奈無何，仰子會尋來尋去攞尋無？佢歸暗夜睡毋會落眠，天旨光即拚緊緊擱去公

園尋。佢有聲喝到無聲，嘴又渴食肚又枵。好得皇天不負苦心人，落尾得環保人員在樹嶼尋著，一人一鳥正擱相逢。

前一駁子，阿生感覺細日頭大啊，即無注意照顧，正顧自家个事，和佢做伴个時間越來越少。哪會知細日頭嘎開始啄自家个毛，到有一日，兩裡翼胛下歸下擱到淨淨淨，即像人破病頭那殼毛光頭共樣共樣，這時阿生正緊張起來，攞緊送去鳥病院。實在苦憐啊！藥錢比人睺病猶較貴！

人講「惹惹惹，豬肉煮米醬；精精精，無屋好居身。」阿生原本猶想講自家一等精，省陪細日頭个時間即趁著時間攞事，毋會仰子，結果害著細日頭，嘛害著自家，正經係假精無錢趁。

這擺阿生學乖啊，開始認真照顧細日頭，猶得佢戴伊麗莎白頸圍<sup>2</sup>，莫得佢擱咬翼胛下；嘛知原來做鸚哥个主人愛真用心，照顧好勢；毋管佢鬥底係快樂抑係悲傷？係受氣抑係緊張？係食肚枵抑係嘴渴？甚至，佢係毋係慍悴？攞愛耐心做伴，恁正會人鳥兩相安。

<sup>1</sup> 鸚哥：音 enˋ gooˋ；鸚鵡。

<sup>2</sup> 伊麗莎白頸圍：音 rhiˋ li saˋ pa giangˋ bbiˋ；一種圓形中空套在寵物脖子上，用來防止寵物抓或咬傷身體的項圈。。

【青春痘】徐秀英原作

前一駁子鼻頭啣出一粒青春痘，又紅又腫，真礙目<sup>1</sup>又毋會摸个，一想著愛扞佢出出入入，心情攞操煩起來啊！學生逐儕功課壓力大，長透無法度睡飽眠，有人講係火氣大引起，有人講係面無洗淨俐，毋過，同學攞知，這係少年人个專利，記錄佢人个青春。

青春痘係得人畏个違章建築，即像在遐平整个路面翹起來个人孔蓋；像光滑个球面上遐粒摩毋會落去个灌風嘴。若歸面生到密密又發膿，這時務定著愛注意感染个風險，若無正經即會得佢舞到毋知仰子好，即驚一無注意生到白幼个面，嘎變做礫礫砣砣个「月球表面」，到時自家就只好刻耐「蹣月球」啊。

為著討打敗青春痘外星人个攻擊，佢決定進行作戰計畫，經驗豐富个阿依，順利坐上指揮官个大位。因為鼻頭遐粒頭大粒頭疾，盲熟又毋會用擠个，阿依提出佢个秘密武器，綠豆粉和蜂糖，佢拗這兩件攪共下，膏在佢个鼻頭，佢拗阿依講，鼻會得蟻子扛走無？阿依著面笑著面啞佢應講：「佢成過即恁膏好个，比

起你這滿个樣，毋會較慘啦！」。

阿依攞講，食个物件毋會用傷臊，火氣大青春痘正會直直發。佢和同學下課个時，固定會去賣鹽酥雞个擔頭買雞排，炸到酥酥香香个雞排，單單想著即會流口涎，猶攞愛攞上暗頭个課，雞排係真多學生頭愛个。阿依不時交代，毋好直直食這兜有个無个，買粒麵包先砣食肚，轉來正食正頓嘛會用。毋過，即係真難顧這支嘴啊！為著自家一面个春光，佢心肝底想，死馬當做活馬醫，即聽阿依个好啦！嘛來調整一下飲食个習慣。阿依个秘密武器毋單綠豆粉和蜂糖，笏瓜、蘆薈、黃連，菊花茶……，膏个食个樣樣齊。

逐暗洗好臉身到睡个一細段時間，佢會賞手機放鬆心情。這時務，有責任心个指揮官——阿依，定著會來推門，門个遐裡阿依大聲放送：「睡毋罅眠，青春痘毋會好哦！」雖然抗痘个過程有一兜仔難耐<sup>2</sup>，好得佢這滿个面有越來越金滑个現象啊。

<sup>1</sup> 礙目：音 ngai hm'；礙眼。

<sup>2</sup> 難耐：音 nai` nai；難以忍受。

編號 7 號

【老屋下个風景】蕭瑞琪原作

半晝邊，歸去老屋下遶遶啊。一行入屋裡背，阿爸坐在矮凳仔，報紙圍在矮桌仔頂，棚等眼枷仔<sup>1</sup>在該看國家大事；母嬭<sup>2</sup>坐在竹椅仔頂，腳架啊細矮圓凳，目聚聚仔看等家庭副刊。日花仔對窗仔斜斜晟入屋肚恬靜恬靜，眠在桌頂頂个烏貓仔兩隻腳還撇等報紙在該睡目，分佢打門个聲嚇著一下，擘開目珠懶懶仔看過來，又眠轉去繼續睡厥目。

老屋下有三隻貓仔，全都係路脣拈來个。該當時還係貓子，正開目無幾日，分人用紙箱仔裝了圍在路脣草墩頂。阿爸散步經過，聽著細細仔喵！喵！喵个聲，正發現這兜衰過个貓子。阿爸同貓子帶歸屋下，倒一息牛乳在盤仔頂，貓子鼻著牛乳味，要要翹翹<sup>3</sup>爬啊盤仔脣，用軟軟个舌嫵緊舐，牛乳還糊啊鬍鬚頂變白鬚了，蓋得人惜。三隻貓子个毛色無共樣，一隻像乳牛一跡烏一跡白，尤其四隻腳个腳趾頭前白白，蓋像著白襪樣仔，就同佢安名「細白襪」；另外一隻全身係烏金烏金个長毛，就喊佢「長毛

仔」；還有一隻係柑仔色，又有一浪一浪个花紋，就安到「細柑仔」。毋過母嬭無恁大神氣記佢等个名仔，就喊佢等「花花个」、「長毛个」、「黃黃个」。

細貓仔日見日大，變做活跳个大貓仔，不時會自家開窗仔走出去野上野下，等到野瘵了正對窗仔鑽入來。貓仔本成係貓科動物，同獅仔共樣有打獵个本能，雖然經過了一萬年个馴化，但係本能無完全消失。故所，暗晡頭時常會走出去扭老鼠仔、透地龍、黏蛇仔歸來放在門頭前；日時頭還會在陽臺晡鳥仔，見擺係看著佢恬索索仔跔在該，目金金仔看等屋頂，總會有飛毋掣个禾鷄仔、斑鳩仔、月鴿仔畀打下來。

這駁仔歸去老屋下，總會看著三隻貓仔目絲絲仔在該啄目睡，母嬭講：「這兜貓仔老了喲，毋多好出去寮了，每日眠在屋肚睡目。」係照貓仔个年紀數算，佢等也係高齡貓了。每朝晨，兩個看報紙个老人家同三隻啄目睡个老貓仔，就係老屋下个風景。

<sup>1</sup> 眼枷仔：音 ngian` ga` e`；眼鏡。

<sup>2</sup> 母嬭：m ma`；母親，亦可稱「阿姆」。

<sup>3</sup> 要要翹翹：音 fung` fung` kieu kieu；搖搖晃晃；因為不穩而傾倒。

編號 8 號

【一雙筷子】黃秋枝原作

「好撿碗筷了哦！」

佢等係用筷子个民族，從細就愛學會使筷子，學會使筷子之前爺哀挾食分佢等。毋曾盡會使筷子食飯以前，筷子拿等搵上搵下<sup>1</sup>，因為無熟絡划飯挾菜个要領，嘎挾啊落落跌；等到會使筷子該下，又好絕絕仔<sup>2</sup>這挾該挾，挾啊歸碗自家一等好食个菜。

屋下大人儕長透教講：「筷子毋好恁精！好食个東西愛曉得勻等來大家食。」阿姆乜教講，筷子係有生目珠个，佢等想食哪項就看準準挾啊起，毋好挾去挾轉、搵來搵去，愛注重衛生同禮貌正好。還有，食飯時節，筷子愛拿正來，愛遵守拿筷子个規矩，絕對做毋得用筷子敲碗、敲桌仔，像乞食仔討食樣仔；手指公同拈食指愛夾纏筷子个上截，另外三支手指自然彎彎對齊，夾好筷子个兩頭，拈食指毋好搵起來像指等人罵樣仔；毋好咬筷子；筷子乜做毋得插在碗對中；食飯拿等筷子準賭搞這兜禁忌。

係無，大人儕就會大聲喝：「無人教个係無？」過嚴條个，還會用筷頭敲啊去，該餐飯乜有可能分大人儕喝下桌。

最記得，還細佢屋下个筷子係竹仔做个，阿姆長透吩咐，好天个時節筷子愛拿啊日頭下晒，係無會生菇上烏點，愛落嘴个東西儘採毋得，愛知「病對嘴入，禍對口出」个道理。故所，還細時節，晒筷子乜係佢个頭路，一支一支頭對頭、尾對尾，擺開來拿啊天下晒日頭。

頭擺人，留人客在屋下過餐乜會講：「糯米打糝罕得幾多時？便菜飯仔乜就加一雙『筷子』定定。」人情係好，食水乜甜，一雙「筷子」增添了人同人之間个交流同感情。還記得，有一擺愛敬床公婆搵擺菜盤，佢就照佢等食飯个規矩準備一雙筷子，阿姆遽遽喊講同筷子拿轉去，相傳，敬床公婆毋使拿筷子，係拿筷子敬床公婆，床公婆會拿筷子教示細人仔這種生趣个講法。

人講，筷子一頭圓一頭方，就像天圓地方；手拿筷子五支手指愛上中下配合使用，代表天地人三才；筷子一分做二，又合二做一，代表陰陽結合，包容、平衡、和諧。

<sup>1</sup> 搵上搵下：音 fag` song` fag` ha`；喻無法自主的揮來揮去。

<sup>2</sup> 好絕絕仔：音 hau qied qied e`；喻興致勃勃。

編號 9 號

【細日頭】胡明華原作

「細日頭」係阿生畜个鸚哥，兩片面頰卵有紅啾啾仔个圓圈仔，看起來就像細細个日頭，故所安佢「細日頭」。佢圓身白白，尾長長，頂頂有一抓長長、黃黃梳到腦之背个頭那毛，身形盡靚。

細日頭幼鳥時節就分阿生對店項接到屋下，對佢歸身無毛皺皮皺摺到翼胛个毛生到蓋金頭，最親个就係阿生。見看著阿生，佢就一等歡喜，暢啊佇毋著，啾啾滾緊唱歌仔。佢長透企在阿生个拈食指抑係肩頭項，還不時會憑兼來，用嘴輕輕仔啄阿生个面，啗出一細截舌嫵啞阿生，有時還會啞啊耳砵，迂來迂去，實在生趣。有一擺，阿生翕一張細日頭啞厥面个自拍相片，細日頭看啊著，敢又過再啞加一到，屋下人嗆啊眨轉來。

細日頭个毛正生齊个時節，識飛走一擺。該日，阿生毋知哪條腸仔毋直，攞等鳥籠仔去公園，學人放鳥仔，試想嘍細日頭飛出去再過飛轉來，想愛展風神。無想著鳥籠仔正打啊開來，細日頭閉翼就飛啊十二樓恁高，跔等就無蹤無跡了。阿生心焦啊無結無煞，仰會尋去尋轉都尋無？佢歸暗晡睡毋落覺，天旨光就緊拚

拚仔再去公園尋，佢對有聲喊到無聲，嘴又燥肚又渴。好得皇天不負苦心人，尾項分環保人員在一頭樹頂尋著，一人一鳥正過再相逢。

前一駁仔，阿生試著細日頭大了，就無注意照顧，淨顧自家个事，陪佢个時間緊來緊少。吉知細日頭嘎開始背自家个毛，到有一日，兩片翼胛下總下擲啊淨淨，就像人發病、頭那毛毳淨淨共樣。這時節，阿生正緊張起來，共快同佢送去鳥仔醫院。衰過正得啊！藥錢比人看病還過貴！

人講「惹惹惹，豬肉煮米醬；精精精，無屋好居身。」阿生原旦還話著自家一等精，省核陪細日頭个時間就賺著時間趕事，毋會仰仔，嘎害著細日頭，也害著自家，正經係「假精無錢賺」。

這擺阿生學乖了，開始認真照顧細日頭，還分佢戴伊麗莎白頸圈，避免佢過再啄翼胛下；也知得原來做鸚哥个主人愛盡用心，照顧好勢：不管佢係快樂抑係悲傷；發譴抑係緊張；肚飢抑係嘴渴；係毋係會愁慮闕搯<sup>1</sup>，都愛耐心樣陣，恁呢正會人鳥兩相安哪！

<sup>1</sup> 闕搯：音 ad` zad`；心情鬱悶。

【長薯仔】徐秀英原作

前一駁仔，鼻公頭哼出一粒長薯仔，又紅又腫，蓋刺眼<sup>1</sup>又動毋得。一恸著愛帶等佢出出入入，心情都懊躁<sup>2</sup>起來了！學生仔人功課壓力大，長透目無好睡恁足，有人講係火氣大引起，有人講係面無洗淨，毋過，同學都知，這係後生人个專利，記錄佢等个青春，故所長薯仔又安到「青春痘」。

長薯仔係得人畏个違章建築，就像在該平整个路面翹起來个人孔蓋；像金頭个球面頂該粒撇毋下去个風嘴仔。係歸面仔生到密密又鼓膿，這時節定著愛注意感染个風險；係無，正經就會分佢搵到無結無煞。就驚一無注意，生著白幼个面，變做礫礫砣砣个「月球表面」，到時節自家就打刻耐「歇月球」了。

為著愛收拾<sup>3</sup>長薯仔外星人个攻擊，佢決定進行作戰計劃。經驗豐富个阿姆，順利登上指揮官个大位。因為鼻公頭該粒最大粒最痛，旨熟又亟毋得<sup>4</sup>，故所阿姆拿出厥秘密武器——綠豆粉同蜂

糖。佢同這兩項攪共下，膏在佢个鼻公頭。佢同阿姆講，鼻公會分蟻公扛走無？阿姆緊嗔緊視佢應講：「佢頭擺就恁呢膏好个，比起你這下个樣式，仰仔都毋會還過慘啦！」。

阿姆又講，食个東西做毋得忒躁；火氣大，長薯仔正會緊哼。佢同同學下課个時節，固定會去賣鹽酥雞个攤仔買雞排。炸到酥酥香香个雞排，淨恸就會流口涎；過再愛趕上暗晡頭个課，雞排係蓋多學生仔蓋好个選擇。阿姆不時交代毋好緊食這兜有个無个，買粒麵包先砣肚筍，歸來正食正餐乜做得。毋過，就係蓋難掌這張嘴啊！為著自家一面个春光，佢心想，死馬做生馬醫，就聽阿姆个好了！乜來調整一下飲食个習慣。阿姆个秘密武器毋單淨綠豆粉同蜂糖，笏瓜、油蔥<sup>5</sup>、黃連，菊花茶……，膏个食个項項齊。

每暗晡洗好身到睡目个一細段時間，佢會搞手機仔放鬆心情。這時節，有責任心个指揮官——阿姆，定著會來推門，門个該片阿姆大聲放送：「目睡毋足，長薯仔毋會好哦！」雖然抗痘个過程有息把仔難耐，好得，佢這下个面有緊來緊光生了。

<sup>1</sup> 刺眼：音 qiug` ngian`；礙眼。

<sup>2</sup> 懊躁：音 au zau；喻心煩意亂。

<sup>3</sup> 收拾：音 su` sab`；收拾、打敗。

<sup>4</sup> 亟毋得：音 gid m` ded`；不能擠壓。

<sup>5</sup> 油蔥：音 iu` cung`；蘆薈。